



10713

東坡集卷之四十八

尺牘

眉山蘇軾東坡氏著

與滕達道六十八首 杭倅

某啓近因使還奉狀必達北日想惟軒旆已達太原鎮撫之餘起居佳勝某此月出都今已達泗上淮山照眼漸聞吳歌楚語此樂公當見羨也吳中有幹幸不外方暑千萬爲時自重

二以下俱密州

某再啓東武今歲蝗災尤甚而官吏多方繩以微文蠲放絕少自到任不住有人戶告訴既非檢覆之時已奏乞體量減放仍已申

東坡集卷四十八 尺牘

聞去訖或更得明公一言尤幸也新法隊伍已團結次然有州縣不得干預之說自古豈有郡守而不得管兵者其他不便未可以一二數也咫尺無緣一見以盡所懷昨日得舍弟書王殿丞又恐却赴任果爾則辟命又未可知也窮蹇圖事無適而不齟齬好笑好笑

三

某啓新法將官所管兵更不差出而本州武衙差在巡檢者千餘人若拙還則威勇忠果之類必填不足已申安撫司去訖爲論列也

某啓違遠已久瞻仰日深卽辰履茲凝沍台候何如某孤拙無狀
得在麾下蓋天幸也但門庭咫尺無緣馳候豈勝悵然唯冀上爲
廟社益加自重謹奉啓上謝不宣

某再拜舍弟仰珩辟書荷恩至深不唯得所託附以爲光寵又兄
弟久別得少相近私喜殊深但未知可決得否渠朝中更無人可
與問逐明公憐之少爲留意當不難得也久違左右所懷千萬非
書所能盡也

東坡集卷四十八

尺牘

二

六以下俱徐州

某啓輒有少事奉白向在密州有都巡檢王述崇班者以踰濫體
量致仕不得廢子述乃慶曆名將王仲寶之孫咸之子咸爲鹽賊
李小二所殺述不肯發喪手擒此賊剗心祭其父乃肯成服僕且
以此奏其畧云忠孝臣子之大節踰濫武夫之小過捨小錄大先
王之政也先帝爲特官其子璋璋有武幹慷慨有父風而頗畏法
今聞其在公部內巡鹽料未有人知之願公呼來與語若果可采
望特與提拔剪拂異日必亦一快辣將官也想知道我之深不罪造

某啓示喻宜甫夢遇於傳有無某聞見不廣何足取正然冷暖自知始未可以前人之有無爲證也自聞此事而士大夫多異論意謂塗中必一見得參扣更不果此意衆生纏繞愛賊故爲饑人所燒然其間自有燒不着處一念清淨便不復食亦理之常無足怪者方其不食不可強使食猶其方食不可強使不食也此間何必生異論乎願公以食不食爲且暮以仕不仕爲寒暑此外默而識之若以不食爲勝解則與異論者相去無幾矣偶蒙下問輒此奉啓而已不罪

東坡集卷四十八 尺牘

三

八

某欲面見一言者蓋謂吾儕新法之初輒守偏見至有異同之論雖此心耿耿歸於憂國而所言差謬少有中理者今聖德日新宏化大成回視向之所執益覺疎矣若戀志易守以求進取固所不敢若曉曉不已則憂患愈深公此行尚深示知非靜退意但以老病衰晚舊臣之心欲一望清光而已如此恐必獲一對公之至意無乃出於此乎輒恃深眷信筆直突千萬恕之死罪

九

安道公殆是一代異人示諭極慰喜慰膏

十 以下俱黃州

某啓別來忽復中夏永日杜門思仰無窮比來起居何如張奉議
來稍獲聞問甚慰所望府第已成雄冠荆楚足使來者想見公之
風度無緣一寓目但有企想乍熱惟冀順時爲國自重因楊道士
行奉啓上問不宣

十一

某啓冗迫不時上狀伏想台候勝常某蒙庇如昨未還老哲輿論
欽然更異爲國順時自重區區不宣

十二

東坡集卷四十八 尺牘

四

某啓乍冷其惟台候萬福近因還使拜狀必達某蒙庇如昨廢放
雖久憂畏不衰見且杜門以全衰拙諸不煩垂念何時展奉臨紙
蕤結尚冀以時自重少慰區區奉啓上問不宣

十三

某啓孟震亨之朝散與之黃州故人相得極懽今致仕在部下日
乞照管其人真君子也

十四

某啓專使辱示手書且審比日台候康勝甚慰下情某蒙庇如昨
但旬日來親客數人相過又李公擇在此不免往還紛紛裁謝小

稽諒未深訝未緣展奉惟冀順時爲國自重謹奉手啓上問不宣

十五

某再啓蜀僧遂獲大字以歸不肖增重矣感怍之至蕭相樓詩固見之子由又說樓之雄傑稱公之風烈記文固願掛各豈復以鄙拙爲解但得罪以來未嘗敢作文字經藏記皆逆語想醞釀無由故敢出之若此文當更俟年載問爲之如何仲殊氣試必得其詳許傳授莫大之賜也此道人久欲游廬山不知有行期未若蒙他一見過又望外之喜也數年來覺衰不免回嚮此道矣不一

十六

東坡集卷四十八尺牘

五

某恃舊眷輒復少懇本州倅孟承譔震老成佳士有一子應武舉未有舉主欲出門下輒納其家狀幸言其進特爲收錄孟倅以未嘗拜見不敢便上狀其子頗有學行更乞詳酌累有干瀆悚息不可言不一

十七

某啓孟生還領書教并賜大字二墨喜出望外從遊不厭而不得公大字以爲關典故輒見意始望數字耳豈敢覬許大卷乎張君又有假虎之說每不敢當公若不嫌有何不可比日台候何如李嬰長官乞告改葬過府欲求防護數人乞不阻乍暗萬乞爲國自

重冗中不宜

十八

某啓專人復來承已過信陽跋涉風雨從者勞矣比日起居何如某比謂公有境上之約必由黃陂遂徑來此拙於籌量遂失一見愧恨可知然所言者豈有他哉徒欲望見顏色以慰區區且欲勸公屏黜浮幻厚自輔養而已想必深照此誠人還忽忽不宜

十九

某啓近專人還奉狀必達比日台候何如連月陰雨旅懷索寞望德馳情如何可言尚冀保練以慰微願因孟生行少奉區區不宜

東坡集卷四十九

尺牘

六

二十

某啓知前事尚未已言既非實終當別白但目前紛紛衆所共嘆也然平生學道專以待外物之變非意之來正須理遣耳若緣此得暫休逸乃公之雅意也黃當路過往不絕語言人事人情難免不若稱病不見爲良計二年不知出此今始行之耳西事得其詳乎雖廢棄未忘爲國家慮也的信可示其畧否不能盡區區

二十一

某閑廢無所用心專治經書一二年間恐了得論語書易舍弟已了却春秋詩雖拙學然自謂頗正古今之謬粗有益於世頃日無

往往自笑不會取快活真是措大餘業聞令子手筆甚高見其字想見其人超然者也

二十一

某啓專使至遠辱手誨累幅伏讀感慰所喜比來起居康勝不足云也某生百如常杜門謝客已旬日矣承見教益務閑藏而已近得筠州舍弟書教以省事若能省之又省使終日無一語一事則其中自有至樂殆不可名此法竒秘惟不肖與公共之不可廣也書本亦可摹爲省事故亦納去耳今却付來使不罪吳畫謾附去冬至後齋居四十九日亦無所行運聊自反照而已願公深自愛不惟矣酒味極佳此間不可髣髴也

東坡集卷四十八尺牘

七

表區區難盡言想識此意也

二十三

某近張處蒙寄貺四壺今又拜賜數知不違條然屢爲煩費已不惟矣酒味極佳此間不可髣髴也

二十四

某啓所示文字輒以意裁減其冗別錄一本因公之成又稍加節畧爾不知如何漕司根韜拮據微瑣於公尤爲便也緣此聖主皎然知公無過矣非特不足卹乃可喜也但靜以待命如乞養疾之類亦恐不宜荷異眷不敢不盡璋師羅漢堂記俟試思量仍作伽

語莫不妨否然廢人之文章未必喜之如何

二十五

某啓公忠義皎然天日共昭又舊德重望舉動當爲世法不宜以小事紛然自辨若如來喻引罪而乞寬司僚於義甚善卑意如此

二十六

某到黃彼聞公初五日便發出信陽路赴闕然數日如有所失也欲便歸黃州又雨雪間作向僧房中明窗下擁數塊熟炭讀前漢書哀太子傳贊深愛之反復數過知班孟堅非庸人也方感歎中而公書適至意思豁然稍晴暖當陽羅江上放舟遠黃也

東坡集卷四十八尺牘

八

二十七

某啓近日人還奉狀必達雪後寒苦伏想起居住勝歲復行盡展奉何時旅懷索然但有傾系尚冀爲時自重別膺新社

二十八

某再拜見戒不爲外境所奪佩此至言何時忘乎王經臣者觀其語論微似颯颯然其言未足全信也所傳小詞爲僞託者察之然自此亦不可不密也回文比來甚奇嘗恨其主不稱若歸吾人真可喜可謂得其所哉亦須出也元素若果來一段奇事當預以書約之今攜俊生來一夔足矣冗迫久不上狀伏想台候勝常某蒙

既如昨未還老哲輿望缺然更冀順時爲國自重

二十九

某啓示喻夏中微恙卽日想全清快近聞元素開閣放出四人此最衛生之妙策其一姓郭者見在野夫處元素欲醒而野夫方醉爾頌示一小團皆新奇蘇合酒亦佳絕每蒙輟惠慙感可量今日見報蒲傳正舩出天壽院何耶張夢得嘗見之佳士佳士

三十一

屢枉專使感愧無量兼審比來尊體勝常以慰下情某近絕佳健見教加元素黜罷薄有所悟遂絕此事仍不復念方知此中有無

東坡集卷四十八 尺牘

九

量樂回顧未絕乃無量苦辱公厚念故盡以奉聞也晚景若不打登此事則大錯雖二十四州鐵打不就矣旣欲發一笑且欲少補左右耳不罪不罪

三十二

公解印人覲當過岐亭故縣預以書見約輕騎走見極不難慎勿枉道見過想深識此意年冷萬乞自重

三十二 以下俱離黃州

某啓僕買田陽羨當告聖王京伶餘生許於此安置幸而計者遂築室荆溪之上而老矣僕當閉戶不出君當扁舟過我醉甚書不

成字

三十三

某晚生蒙公不鄙與游又令出字似涉僭易願公自命却示及作字說乃寵幸也

三十四

某再拜承示喻盛字見私老云改作達道不知尚未定耶欲令重議此朋友之事某於公爲晚輩豈敢當此然公有命不敢違當徐思之先以書布聞左右然後敢作說也惶恐惶恐

三十五

東坡集卷四十八尺牘

十

某啓久不奉狀愧仰日深辱專人手書具審比來台候勝常感慰兼集自聞公得吳興日望一見於中途而所至以賤累不安遲留就醫竟失一嬰兒又老境所迫歸計茫然故所至求田問舍然卒無成十四日決當離此真州更不敢仕恐真守堅留當任一日不知公猶能少留以須一見否死罪死罪若到揚間公猶在亦須營輕舟往見也若又失此期則遂遠別矣漸涼惟順時爲國自重人還謹奉狀布謝不宜

三十六

某去歲所買田已旱損一午更十日不雨則已矣竒窮所向如此

可笑可笑耘老遠去此意豈可忘老病憔悴得公厚顧翹然增氣也

三十七

某啓疊蒙遣人賜書憂愛厚甚感忤不已比日履茲新涼台候勝常深慰下情喪子之戚尋已忘之矣此身如電泡況其餘乎聞今日渡江恨不飛去風逆不敢渡又與一人期於真州有少急切之幹度非十九日不可離真早發莫可見公以二十日行猶可赴上官日也不知能少留否若得畧見喜幸不可言也餘異爲時自重

三十八

東坡集卷四十八 尺牘

某到此時見荆公甚喜時誦詩說佛也公莫畧往一見和甫否餘非面莫能盡某近到筠見子由他亦得旨指射近地差遣想今已得替矣吳興風物足慰雅懷郡人有賈收耘老者有行義極能詩公擇子厚皆禮異之某尤與之熟願公時一顧慰其牢落也近過文肅公樓徘徊懷想風度不能去某至楚泗間欲人一文字乞於常州任若幸得請則扁舟謁公有期矣

三十九

某啓別後不意遽聞國故哀號追慕迄今未已惟公忠孝體國受恩尤異悲苦之懷必萬常人比日起居何如其旦夕過江徑往毗

陵相去益近時得上問也爲時自重不宜

四十一

某再啓承差人送到定國書所報未必是實也都下喜妄傳事而此君又不審乃四月十七日發來邸報至今不說是可疑也一夫進退何足道所喜保馬戶導洛堆梁皆罷茶鹽之類亦有的耗矣二聖之德日新可賀可賀令子各安勝未及報狀也

四十一

某啓耄老至又辱手書及私老道起居之詳感慰不可言某留家儀真獨來常以河未通致公見思之深又有舊約便當往見而家

東坡集卷四十八

尺牘

主

無壯子翁須却還服挈定居後一日可到也惟深察近日京日時有差除或云當時亦未是實計當先起老鎬僕或得蓮茹耶惠貺三十壺携歸餉婦矣餘私老能道不宜某頃首

四十二

聞張郎已授得發勾春中赴十安道必與之俱來某若得旨當與之聯舟而南窮困之中一段樂事古今罕有也未知遂此意否泰太虛言公有意折却逍遙堂橫廊切謂且且留之想未必爾聊且言之明年見公當館於此公雅度宏偉欲其軒豁甲意又欲其窈窕深密也如何不罪造次

四聲可罷之萬一浮沉反為患也幸深思之不罪

某再啓近在楊州人一文乞常州住如向所面議若未有報至南都再當一削也承郡事頗繁齊整想亦期月之勞爾微疾雖無大患然願公無忽之常作猛獸毒藥血盆膿囊觀乃可勿孤吾黨之望而快羣小之志也情切言盡必恕其拙幸甚

某啓一別四年流離契濶不謂復得見公執手恍然不覺滄下風

東坡集卷四十六尺牘

三

俗日惡忠義寂寥見公使人差增氣也別來情懷不佳忽得來教甚解鬱鬱且審起居佳勝為慰某以少事更數日方北去宜興田已問去若得稍佳者當扁舟徑往視之逐一至湖見公固所願然事有可慮者恐未能往也若得請居常則固當至治下攬擾公數月也未間惟萬萬為時自重

某再啓別論具感知愛之深一一佩刻董田已遣人去問宜興親情若果爾富乘舟徑往成之然公欲某到吳興則恐難為不欲盡談唯深察之到南都欲一狀申禮曹凡刊行文字皆先毀板如所

教也有監酒高侍禁永康者與之外姻間亦甚謹幹望畧照此如
察其可以剪拂又幸也

四十七

以下俱
赴登州

某啓前蒙惠建茗甚荷醉中裁謝不及愧悚之劇登州見闕不敢
久住遠接人到便行會合邈未有期不免悵惘舍弟召命益虛傳
耳君實恩禮既異責望又重不易不易某舊有獨樂園詩云兒童
誦君實走卒稱司馬持此將安歸造物不我捨今日類詩識矣見
報中憲言有揆不當見在告必知之京東有幹幸示喻

四十八

東坡集卷四十八尺牘

尚

某啓專使至辱手誨伏承起居佳勝大慰馳仰某受命已一月甚
欲速去而遠接人未至船亦未足督之矣向雖有十日之約勢不
可住愧負無限區區之學頃亦試之矣竟無絲毫之補復此強顏
歸於無成徒爲紛紛益可愧也心之伊鬱非面莫能道想識此意
唯萬萬爲人自重人還奉啓上謝不宣

四十九

某啓承專人借示李成十幅圖遂得縱觀幸甚幸甚且斬借留令
李明者用公所教法試摹看只恐多累筆耳此本真竒絕須當愛
護也月十日後當於徐守處借人賞納

某啓前者使還辭中裁謝極於散慢至今恐愧不審比日台候何似某已被命實獎借之素已奏候遠接人計不過七月中下旬行伏恐知之士論望公人覲久未聞何也想亦不遠無由別瞻望惋悵溽暑方熾萬冀順時爲國自重不宣

五十一

許爲置朱紅累子不知曾令作否若得之攜以北行幸甚如不及已亦非急務不罪

五十二

以下俱登州

東坡集卷四十八尺牘

七

某啓人春來連日雨今日忽晴快所居江山爽秀悵然懷公不知頗作樂否近得安道及張郎書甚安徙子由想已過矣青州資深相見極懽今日赴其盛會也閑恐要知

五十二

某再拜自承哀歎日欲拜疏以不審知從者所至以故至今日月如昨忽復徂暑伏惟追慕摧切觸物增慟奈何奈何即日伏料孝履支福明公聲望隱然雖未柄用坐鎮一方猶足以携持人心今茲退歸有識所共嘆而孤拙無狀尤爲矢巨庇也唯冀節哀自車少慰區區謹奉手啓上聞不次

五十四

某啓少懇而聞不罪不罪某好携具野飲欲聞公求朱紅累子兩
草二十四隔者極爲左右費然遂成藉草之興爲賜亦不淺也有
便望頒示悚息

五十五

某本作此書託一同人帶去既而其人却留滯淮南近復

勝慚悚今復附上前疏貴察其非懈怠也忽然秋盡冠居何似向
承示喻斤斧鄙詞非見愛之深豈能爾耶向示自有一本云且闕
尊前見在身恐閑知之東方有幹乞示下

五十六

東坡集卷四十八尺牘

六

某子求累子已蒙佳惠又爲別造朱紅尤爲奇妙物意兩重何以
克當捧領訖感愧無量者昨寄在常州令子由帶入京俟到不
日便持上也

五十七

饋魚三百枚黑金棋子一副天麻煎一節聊爲土物不罪浼觸令
子思渴冗中不及別啟

五十八

某感時氣臥疾逾月今已全安但幼累更臥尚紛紛也措道人名

世昌歸竹人多藝然可開攻驗亦足以遺瀝也留此幾年與之
稍熟恐要知

五十九

所有二賦稍晴寫得寄上次只有近寄潘谷求墨一詩錄呈可以
發笑也衲衣尋得不用更尋累草感留意悚恻之甚甘子已拜賜
矣北方有幹垂示

六十

某屏居如昨舍弟子由得安問此外不煩遠念久不朝覲緣此得
望見清光想足慰公至意其他無足云者貴眷令子各計安勝月

東坡集卷四十八尺牘

七

中前急足遠寄必已收得啓示諭

六十一

登州還朝

某啓此去見有方藥可以起公之微疾者專爲訪之如所諭也四
月中所報及却罷之由未聞其實到都下當馳白也

六十二

以下俱
南音

某慰言不意禍故奄及閨閣聞問怛然悲惋不已竊惟恩義之重
哀痛難堪日月如昨屢易弦望追慟無及觸物增感奈何奈何未
由躬詣吊問臨紙哽塞謹奉疏陳慰謹疏

某啓驚聞郡封傾逝悲愴無量恨不躬往慰問但以至理寬譬左右也平日學道熟觀真妄正爲今日但當審察本心無爲客塵幻垢所汚況公望重中外今者人物雕喪耆老殆盡切須自愛若使纏綿留戀不卽一刀兩段乃是正當常態非所望於傑人也願三復此語而已餘非面能盡

六十四

某以館伴北似半月比出方聞公有閩中之感慰問後時本欲別作令子昆仲慰疏秦君行速作書未及惟千萬節哀以慰親意也和次別奉狀

東坡集卷四十八尺牘

六十五

以下俱翰林

某啓迫冗稍疎上問愧仰增極切想下車以來靜治多暇有以自適卽日履茲酷暑台候何似某忝冒過分非提獎有素何以及此明公舊德偉望尚在外服輿論未允伏異以時倍加保蓄以慰區區不宜

六十六

某啓近數奉狀一一聞達比日切惟鎮澁多暇台候萬福某蒙正粗遣但躡次驟進處必爭之地非久安計但脫去無由公必念之蒙惠地黃煎扶衰之要藥若續寄尤幸

某再啓瀛州之命既以先諱爲辭想當易地耶所云杭已除元素計必聞之矣佳夢豈特公愛我之深發於想念爾批示黨人甚堪一笑而已子由除戶待方欲辭免也閑恐知之孔經甫外制顧將軍夕拜張仲舉待制皆恐要知廣大格豈敢望李愬子耶然亦有一長從來不敢使倖及賴耳想當一笑寄惠地黃煎感服厚念

六十八

某啓部民董遷篤學能文下筆不凡非復世俗氣韻如請見願加獎勵遂成就之其兄復添學道屏居不與俗交其文亦秀邁可觀

東坡集卷四十八尸牘

五

昔公所欲知者故敢以聞近因親情王承議行託附書信必達某衰病短才任用過量論議疎闊所向難合日俟汰遣而已辱知之厚故粗及之

與李公擇十七首

杭州

某已過滿蘇明之來近聞明之已除臺直果爾替期未可決也雪上主人如不厭客當去勿聒聞已舉姚掾非老兄風義誰肯舉此孤寒木訥之士也哉聞往來者奉談不容口足爲交游之慶暴妙堂記并詩各告求數本向時莘老屢寄然皆墨淡不光告令措揮如法打道場何山時復一游否某雖未得卽替然更得於西湖過

一秋亦自是好事景色如此去將安往但有著衣喫飯處得住且住也但恨舍翁相遠然亦頗得信亦甚好恐要知

二離杭倅

某頃首某茶命皆出推借知幸知幸始者深欲一到吳興緣舍翁在濟南須一往見之然後赴任濟南路由清河而冬深卽當凍合須急去乃可行遂不得一去別所懷千萬非書所能盡也

三

某再拜孝叔丈向有徑山之約今已不遂無緣一別且乞致意陳令舉有書來云相次去奉謁相聚必款東萊所乏茶與柑橙而君地生焉可各致少許爲贖若要瓜壘到任後當寄獻呵呵李君行時不及奉書兼醉後揮抹殊鮮禮悚悚

四赴密州

某已到揚州此行天幸旣得李端叔與老兄又途中與完夫正仲巨源相會所至輒作數劇飲笑樂人生如此有幾未知他日能復繼此否乍爾勝違臨紙於已

五以下俱徐州

某頃首久不得來誨亦稍憂懸料公必不暇爾近領千教果爾劫劫殊不及爲郡之樂比日起居佳勝否貴眷各無恙且喜九郎壯

健勝往日深可慶某輒有一孫體甚碩重決可以扶犁荷鋤想公亦爲我喜也八月十二日生名楚老六郎不見應舉得失如何適往南京爲舍弟此月十一日嫁一女與文與可子呼去幹事憲局尋常少事何爲乃爾紛紛想不常如此也

六

某再拜舍弟得信無恙但因議公事爲一悴所怒日夜欲傾之念脫去未能爾子由拙直之性想深知之非公孰能見容者然實無他爾而人或不亮牢落如此爲一農夫而不可得豈復有意與人爭乎亦不足言聊可一笑而已

東坡集卷四十八尺牘

三

七

子由近爲棲賢僧作僧堂記讀之凜然覺朋崖飛瀑逼人寒冽也

八以下俱黃州

某啓春夏多苦瘡癩赤目因此杜門省事而傳者遂云病甚者至云已死實無甚恙今已頗健然猶欲謝客恐傳者復云云以爲公憂故詳之鄭公雖已逾八旬然耆舊彫喪想當爲國悽愴公擇莘老進用皆可吾然亦彙征之漸殆恐未爾知首料臺閣殊不聞果爾甚可喜元素若能力止其行極佳亦當走書道此也所要新詩實無一字小詞墨竹之類皆不復措思惟於飽食甘寢中得少三

味一笑一笑文編一閱灑然自失濯暄埃而起衰思也

九

某再拜諭養生之法雖壯年好訪問此術更何所得然北年流落瘴地苦無他疾似亦得其力爾大約安心調氣節食少欲思過半矣餘不足言某見在東坡作陂種稻勞苦之中亦自有樂事有屋五間果菜十數畦桑百餘本身耕妻鸞聊以卒歲也

十

某頃首知治行窘用不易僕行年五十始知作活大要足慳爾而文以美各謂之儉素然吾儕爲之則不類俗人真可謂淡而有味

東坡集卷四十八尺牘

三

者又詩云不戢不難受福不那口體之欲何窮之有每加節儉亦是惜福延壽之道似此鄙俗且出於不得已然自謂長策不敢獨用故獻之左右住京尤宜此策也一笑一笑

十一

某啓示及新詩皆有遠別惘然之意雖兄之愛我厚然僕本以鐵心石腸待公何乃爾耶吾儕雖老且窮而道理貫心肝忠義填骨髓直須談笑於死生之際若見僕困窮便相於邑則與不學道者大不相遠矣兄造道深中心不爾出于相好之篤而已然朋友之義重務規諫輒以狂言廣兄之意爾兄雖懷坎壈於時遇事有可

尊主澤民者便忘軀爲之禍福得喪付與造物非兄僕豈發此看
訖便火之不知者以爲詬病也

十二

某啓近領手教極慰想念比日起居何如秋色佳哉想有以爲樂
人生雅寒食重九慎不可虛擲四時之美無如此節者矣寄示妙
藥刀鞘並已領近有潮州人寄一物其上云扶劣膏不言所用狀
如羊脂而頗堅盛竹筒中公識此物否味其各必佳物也若識之
當許以示可分去或爲問習南海物者料公亦不久有別命如未
冬間又得一見孤旅之幸乍冷萬萬自攝

東坡集卷四十八

尺牘

三

十三

某啓杜門謝客甚安適氣術又近得其簡妙者早來此面傳不可
獨不死也子由無恙十月喪其小女三歲矣屢有此戚固難爲情
須臾自解爾所諭曹尤州親情與卑意會已作書問子由次第必
成也鳧臍納少許去然終未知其實不知所諭果然否猶賴不曾
經服食也效劉十五體作回文菩薩蠻四首寄去爲一笑不知公
曾見劉十五詞否劉造此樣見寄今失之矣得渠消息否華老必
時得書在徐樂乎

十四

某啓累獲來教佩戴至意比日起居佳勝雪屢作足慰勸耕之懷
昨日船到送惠木奴人甕筭已作三百疋絹看矣新歲不及奉觴
唯祝晚途遇合使退耕窮士與民物並受其賜也寒苦萬萬自重

十五

與可之亡不惟痛其令德不壽又哀其極貧後事索然而子由婚
其少子頗有及我之累所幸其子賢而文久遠却一復憂唯目下
不可不助他爾

十六

以下俱北還

某啓逆風數日爲左右滯留而孤旅蒙幸多矣但以多別得一見

東坡集卷四十八尺牘

書

風度亦不復以別去爲戚也比日伏惟起居佳勝小舟阻風浪聲
室此依又費照遣矣古鐵納上餘萬萬善愛不宣

十七

某啓兩日連見忽忽竟何言暄和起居何如夷中送王徐州詩有
見及語方是時人以相識爲詩欲一見面道此爲笑竟不見可太
息也適所白是宗人棫雅州幕不一

與錢穆父二十八首

南首

某啓久以使客紛紛不奉書愧仰不可言辱手教且審台候勝常
愛子襁負天喪想深痛割惟深照浮幻一洗無益之悲至望至望

某啓前日辱書及次公到願聞動止之詳慰澆無量微疾想由不
忌口所致果爾幸深戒之某亦病寒嗽逾月不除衰老有疾難愈
豈復如昔時耶承和採菊詞次公處幸見之未由會合千萬順候
自重忽忽奉啓

三

某啓辱書伏承比來尊體安佳甚慰所望書暑不可過使客紛紛
然始不能堪數日以執毒發瘡數處且告謁休養以備坤成終日
之勞也奉羨清閒獨無此福惠茶既豐且精除寄與子田外不敢

東坡集卷四十八 尺牘

三

妄以飲客如來教也然細思之子由既作臺官亦不合與喫薛能
所謂賴有詩情爾呵呵公久外召還當在旦夕掃榻奉候矣不宜

四

某啓長至祝頌之意則深矣不敢上狀懼煩回荅辱手簡甚荷知
照比日起居佳勝河間之命料必難辭日企來音少慰久闕未聞
萬乞爲國自重不宜

五

某近得家報王郎子立暴卒於奉符爲之數日悲慟在告亦緣此
也此君受知於公想亦爲之悽惋子由遠使歸來聞之煩惱可知

子立只一女子竟無見可傷可傷兀中來使告廻不一

六

某啓兩日台候何如知藥力已行必遂輕安飲食不減否何日可

出告令郎寫一二字示下不宣

七

某啓辱示雄篇古人所謂味無窮而炙逾出者不肖何敢庶幾乎

然三五日間當識和謝也入夜布啓草畧不宣

以下俱杭州

某啓多日不上問辱書感慰之至比日起居益佳微疾已痊復新

東坡集卷四十八尺牘

三

詩妙曲得於敵榜間欣承加惠也輒復一篇惟不示人為望雅素

已行遣因毀所集也知之冬來全少事時復開樽湖上但少佳客

爾未由會集千萬以時保衛不宣

九

承錄示元之詩舊雖曾見之今得公親書甚喜令跋寫詩詞如此

豈敢挂名其間呵呵惠示江瑤極鮮庶得大嚼甚快北方書間幾

絕況有苞直見及乎昨日忽得兩壺謹分其一不罪微醜某再拜

十

令子不及奉書并日與楊次公書有少事託面自必達春夏之交

米價必大長可畏公必有以待之幸預以教我數郡閉糴大爲杭
病江東尤爲害也屢移不報錄得其榜已削去依條災傷免力勝
民甚悅恐知杭酥不佳已督之矣

十一

今日得憲檄亦以閩盜恐軼至衢陸爲戒度亦未遽爾也惟浙西
數郡水潦旣甚而七月二十一二三三日大雨暴風幾至掃盡災
傷旣不減去歲而常平之備已空此憂在僕與中玉事有當商議
不可以尺書盡者屢以此意招之絕不蒙留意云冬初方過浙西
雖子功且久到然此大事得聚議乃濟數舍之勞譬如來一看潮

東坡集卷四十八

尺牘

三

亦自佳事試告公以此意勸之勿云僕言也如何如何吾儕件事
十分周備儘可免過小有不至識者應不見置也米分稍平更一
月必貴日夜望中玉來放脚手羅得十餘萬石相次漕司爭糴軍
糧及上供必大翔湧其他合行遣事未易一一遽言願公因會度
可言卽言之幸甚幸甚此事某已兩削矣諸公雖未必喜然度無
不行下之理

十二

某蒙令子寄示五賦幸甚且爲矩範也後舉又預高等矣近本州
舉子數百人來陳狀以習賦者多乞發解各立分數已爲削去矣

聞知之小兒差遣蒙留意以遞中間之矣非久得報卽馳白也悚
息悚息

十三

過拙而愿旣備門下人又日久左右想蒙提誨如子姪不在區區
干禱也乍到穎不能無少冗速遣此人未能盡意令子相見都下
不款曲計今已赴任矣

十四

新刻特蒙頒惠不勝珍感竹萌亦佳旣取筍簞蕊心與鰕相對清
水煮熟用薑蘆服自然汗及酒三物等入少鹽漸漸點灑之過熟

東坡集卷四十八尺牘

三

可食不敢獨味此請依法作與老嫂共之呵呵

十五 穎州

蒙仲過此以急欲省覲不敢攀留甚愧聞試得甚佳且夕馳賀也
兩小兒本令閑看場屋今日勸出皆捷新學妨古解名可愧也

十六 揚州

某啓示諭驛使裁減事旣不出船何用借買許多什物已令本州
一一依做裁定矣幸甚幸甚條式指定事卽未敢擅減知之稍服
別奉狀不罪

十七 以下俱揚州還朝

某啓匿屣伏屨之句所不到也欽羨欽羨

十八

某啓多日不接奉思企之深伏計台候日就康復欲往見恐倦按
啓乞此示數字炷艾必得力也新詩想多有不一

十九

子功數日不相見省中殊岑寂也公何日可出乎

二十

某近蒙同教令記新齋恐必不堪用然亦當試抒思也曾于告豐
令鄧繼友使孟易一京削恐新年求者必多畧乞記錄令子必已

東坡集四十八尺牘

弄

到溫秀老成真遠器也冗迫不盡區區

二十一

某啓多日不接奉思企不可言辱教字承起居佳勝浴會不得服
赴蓋除夜有婚會兩日紛紛也嘉篇幸蒙錄示愁人淚眼之句讀
之惘然公達者何用久爾戚戚嘉節且一笑爲樂區區之祝也

二十二

某啓前日辱簡以妻孥皆病不卽荅悚息悚息陰雨起居何似寄
穎叔詩和得納去與公咫尺胡越何論穎叔也可歎可歎其一章

未穴方再上也不一一

二十三

某啓伏承蒞事之初雖稍勞神而吏民欣悚實爲盛事無由請賀
但有企渴辱簡且審起居佳勝餘俟八日廷中可談

二十四

某啓辱示承起居佳勝熙帥鄙意亦欲餞之公用二日卽當趨赴
元日殿門外更議之也惠貺山芋柑梨感刻之至忽忽布謝不謹

二十五

某啓伏暑伏想起居康勝老婦病稍加某亦自傷暑殊無聊遂且
謁告免詞事也一詩謾呈電掃庭認響長詩筒亦數年來故事也

東坡集卷四十八

尺牘

三

呵呵草不謹

二十六

某啓知盛會早散能過家庖煮菜夜話否忽忽不罪

二十七

某啓辱承起居佳勝所約敢不如教絕早到門惟少設食了兩碑
也醜餞用二十四謹諾

二十八 赴定川

某啓昨日遠勤從者草草就別慨悵不已使至又辱手誨仍以高
篇寵行讀之增恨愴也欲和荅人客如織當俟前路惠茶已戒覓

曹別藏之矣非良辰佳客不輕啜也令子昆仲特煩遠至感作不
已所欲言非可以筆墨既想已目擊自餘惟若時自愛而已不宜
與李伯時

辱手示及惠新醞感愧殊深卽日起居住勝洗玉池銘更寫得小
字一本比之大字者稍精請用陳伯修之說更刻於石柱上爲君
人還奉謝

與郭叻父七首

以下俱
抗倭

昨日承顧訪殊慰久澗經夕起居住否某出院本欲往見以下痢
之力未果想未訝也畧奉啓布謝萬一

東坡集四十八

尺牘

二

久別忽得瞻奉喜慰可量旣以不出又數日臥病遂阻言笑愧悚
不可言稍涼起居佳否某下痢雖止尙蘆藹也謹奉啓布謝

三

兒子歸來別無可爲土物御筆一雙賜墨一圭新茶兩餅皆得之
大臣家眞物也不罪浼瀆

四

辱訪臨感忤獨以忽遽爲恨迫行不往謝惟寬恕乞懇萬萬自重
不宣

五

別來瞻仰無窮風雪凝寒從者勤矣辱書承起居甚佳爲使者卽
至必且暫還惟萬萬自重

六 以下北歸

昨辱寵臨久不聞語殊出意表蓋所謂得未曾有也經宿起居不
勝閒居致厚餽拜賜慙感只今上謁次一肉足矣幸不置酒

七

某今日私忌未敢上謁辱詩和呈爲一笑青皮一片不以餽公則
無與嘗者矣

東坡集卷四十八尺牘

三

與文與可三首

以下俱徐州

與可抱才不試遁道彌久尚未聞大用公議不厭計當在卽然廊
廟間誰爲郵公議者乎老兄既不計較但乍失爲郡之樂而有桂
玉之困又却不見使者嚙面得失相乘除亦畧相當也彭門無事
甚可樂但未知今夏得免水患否子由頗得書甚安示論秋冬過
親甚幸甚幸令嗣昆仲各計安勝爲學相皆成就矣

二

離浙中已四年向亦有少浙物久已分散零落矣有藥玉船雨集
獻上恰好酌酌不道客矣呵呵杭州故人頗多致之不難當續

之但恐得後不肯將盛作見借也

三

近屢於相識處見與可近作墨竹惟劣第只得一竿未說字說澗
筆只到處作記作贊備員火下亦合剩得幾紙專令此人去請幸
毋久秘不爾不惟到處亂畫題云與可筆亦當執所惠絕句過狀
索二百五十疋也呵呵

與文郎 黃州

不審茶毒以來氣力何似變故如昨兩易晦朔追慕無窮奈何奈
何中前人還辱書重增哽咽吾親孝誠深篤若不少節哀摧惟意

東坡集卷四十八 尺牘

三

所及不以後事爲念何以仰慰堂上之心惟萬萬寬中張食

東坡集卷之四十九

尺牘

眉山蘇軾東坡氏著

與王定國四十一首

以下俱黃州

某啓自到黃州卽屬岸人日伺舟馭消耗忽領手教頃解憂懸仍審比者體氣清強且能自適至慰知未決東西計其迂直驗易相去必不懸絕而得一見乃是不肖大幸不識果安從某寓一僧舍隨僧蔬食甚自幸也感恩念咎之外灰心柱口不曾看謁人所云出入葢往村寺沐浴及尋溪傍谷釣魚採藥聊以自娛耳

二

東坡集卷四十九 尺牘

一

某啓罪大責輕得此甚幸未嘗戚戚但知識數十人緣我得罪而定國爲其所累尤深流落荒服親愛隔闊每念至此覺心肺問便有湯火芒刺今得來教旣不見棄絕而能以道自遣無絲髮滯介然後知定國爲可人而不肖他日猶得以衰顏白髮廁賓客之末也甚幸甚幸恐從者不由此過故專遣人致區區惟願定國深自愛重仍以戒我者自戒而已臨書悒悒不知此人到江猶及見仙舟否忽忽不宣

三

某啓揚州有侍其太保者官於瘴地十餘年北歸面色紅潤無一

點瘴氣只是用摩腳心法耳此法定國自己行之更請加工不廢
每日飲少酒調節飲食常令胃氣壯健安道歎朱砂膏某在湖州
服數兩甚覺有益到彼可久服子由昨來陳相別面色殊清潤目
光炯然夜中行氣臍腹間隆隆如雷聲其所行持亦吾輩所常論
者但此君有志節能力行耳粉白黛綠者俱是火宅中狐狸射于
之流願深以道眼看破此外又有一事須少儉嗇勿輕用錢物一
是遠地恐萬一闕乏不繼二是災難中節用自貶亦消厄致福之
一端所懷千萬書不能盡一二也

四

東坡集卷四十九

尺牘

二

某啓賓州必薄有瘴氣非有道者處之安能心體泰健以俟否享
耶定國必不以流落爲戚戚僕不復憂此但恐風情不節或能使
腠理虛怯以感外邪此語甚蠢而情到願君深思先構付屬之重
痛自愛身膏氣舊旣勤於道引服食今宜倍加功不知有的便可
留桂府否

五

某啓君本無罪爲僕所累爾想不久必漸移善地也僕甚願從居
處食物皆不惡但平生不營生計賤累卽至何所仰給須至遠迹
顏淵原憲以度餘生命分如此亦何復憂慮在彭城作黃樓今得

黃州欲換武遂作團練皆先識因來書及之又得一笑也子由不住得書必已出大江食口如林五女未嫁比僕又是不易人也奈何奈何惠京法二壺感愧之至欲求土物爲信僕旣索然而黃又陋甚竟無可持去好笑好笑兒子邁亦在此不敢令拜狀恐煩瀆也承新詩甚多無緣得見耿耿僕不復得此時復看詩而已

六

某作書了欲遣人至江州李奉職言定國必已從江西行必不及矣故復寫此紙遞中發去聞得此中次第人皆言西江漸近上水石湍激險惡不可各大不如衡潭之善安然業已至彼不可復回

東坡集卷四十九

尺牘

三

也若於臨江軍出陸乃長策也貴眷不多不可謂山溪之險而避陸行之勞也衆議如此切請子細問人母以不貴之軀輕犯憂患也則書所憂惟恐定國不能愛身嗇色願常置此書於座右如君美材多文忠孝天稟但得不死必有用於時雖賢者明了不待鄙言但目前日見可欲而不動心大是難事又尋常人失意無聊中多以聲色自遣定國奇特之人勿襲此態相知之深不覺言語直實恐欲知他日不訝也

七

某愛張公知遇至深罪廢累辱其門下獨不復擴絕否如何如何

想時得安問貴眷在彼必安

八

某再拜遞中領手教知已到官無恙自處泰然頃解憂懸又知攝二千石風采震於殊俗一段奇事也某羈寓粗遣但八月中喪一老乳母子由到筠亦拋却一女子年十二矣悼念未衰復聞堂兄中舍卒於成都異鄉罹此觸物悽感奈何奈何近頗知養生亦自覺薄有所得見者皆言道貌與往日殊別更相闊數年索我閩風之上矣兼畫得寒林墨竹已入神品行草尤工只是詩筆殊退也不知何故張公比得書無恙但以厚之去婦家事無人幹頗牢落子

甫坡集卷四十九

尺牘

四

田在筠甚苦局事煩碎深羨老兄之安逸也非久冬至已借得天慶觀道堂三間燕坐其中謝客四十九日雖不能如張公之不語然亦常闔戶反視想當有深益處定國所寄臨江軍書久已收得二書反覆議論及處憂患者甚詳旣以解憂又以洗我昏蒙所得不少也然所謂非苟知之亦允蹈之者願公嘗誦此語也杜子美在困窮之中一飲一食未嘗忘君詩人以來一人而已今見定國每有書皆有感恩念咎之語甚得詩人之本意僕雖不肖亦嘗庶幾髣髴於此也文字與詩皆不復作近爲塋老乳母作一誌文公又求某書輒書此奉寄今日馬鋪李孝基送君謨石刻一卷求其

後有定國題字又動我相思之懷作惡久之數日前發勾沈達過此亦云與定國熟船中會話半夜強半是說定國近有人惠丹砂少許光彩甚奇固不敢服然其人教以養火觀其變化聊以怡神遣日賔去桂不甚遠朱砂若易致或爲致數兩因寄示稍難卽罷非急用也窮荒之中恐亦有一二奇士當以冷眼陰求之大抵道士非金丹不能解化而丹材多出南荒故葛稚川乞岫巖令竟化於廉州不可不留意也陳璞一月前直往筠州看子由亦粗傳要妙云非久當來此人不惟有道術其與人有情義久要不忘如此亦自可重道術多方難得其要然以某觀之惟能靜心閉日以漸

習之但閑得百十息爲益甚大尋常靜夜以脈候得百二三十至迺是百二三十息爾數爲之以覺有功幸信此語使真氣雲行體中瘴冷安能近人也知有煞賣鴉鴨甚便此間無有但買斫鱸魚及猪羊麋鴈亦足矣廩入雖不繼痛自節儉每日限用百五十自月朔日取錢四五百足繫作三十塊掛屋梁上平明以晝杈子挑取一塊卽藏去杈子以大竹筒別貯用不盡者可謂至儉然猶每日一肉蓋此間物賤故也囊中所有可支一年以上至時別作相度日下未須慮也兒子正如所料不肯出官非復小補也信筆亂書無復倫次不覺累幅書到此恰二鼓室前霜月滿空想識我

此懷也言不可盡惟萬萬保首而已

九

桂砂如不難得致十餘兩尤佳如費力一兩不須致也

十

某啓近附桂州遞奉書必達邇來江淮間酷暑殆非人所堪况於
嶺外乎惟道懷清曠必有以解煩釋澁者入秋以來儻然清遠計
尊候安勝僕凡百如昨不須念及子由在高安不住得書無恙近
亦有南都來者云張公及貴聚並安見報舉者更宜省事緘口區
區之至不罪不罪馬朝請過此議論脫然必知所以待定國者展
奉未可期惟萬萬自重不一

東坡集卷四十九 尺牘

六

十一

某啓馬公過此嘉便無好物寄去收拾得茶少許謾充信而已新
詩文近日必更多君學術日益如川之方增幸更著鞭多讀書史
仍手自抄爲妙某自謫居以來可了得易傳九卷論語說五卷今
又下手作書傳迂拙之學聊以追日且爲子孫藏耳子由亦了却
詩傳又成春秋集傳閉知之爲一笑耳桂州遞中有和仲奉和詩
四首不知到未且一報之

其通中領書及新詩感慰無窮得知君無恙久居蠻夷中不鬱鬱
足矣其他不足云也馬處厚行曾奉書必便達不知今者爲在何
許且盤桓桂州耶爲遂還任耶重九登樓霞樓望君淒然歌于秋
歲滿坐識與不識皆懷君遂作詞云霜降水痕收淺碧鱗鱗欲見
洲酒力漸消風力軟颼颼破帽多情却戀頭佳節若爲酬但把清
樽斷送秋萬事回頭都是夢休休明日黃花蝶也愁其卒章則徐
州逍遙堂中夜與君和詩也來詩要我畫竹此竟安用勉爲君作
一紙奉寄子由甚安吾儕何嘗不禪而今乃始疑子由之禪爲鬼
爲佛何耶丹砂若果可致爲便寄示吾藥竒甚聊以爲閑中詭異
之觀決不敢服也張公久不得書彼必得安問乍冷萬萬以時自
重夜坐醉中作此書仍以君遣我墨書也不宜

十三

東坡集卷四十九

尺牘

七

某啓如聞晉卿已召還都月給百千其女泣訴聖主爲惻然也恐
要知來詩愈竒欲和又不欲頻頻破戒自到此惟以書史爲樂比
從仕廢學少免荒唐也近於側左得荒地數十畝買牛一具躬耕
其中今歲旱米貴甚近日方得雨日夜墾闢欲種麥雖勞苦却亦
有味鄰曲相逢欣欣欲自號麀糟陂裏陶靖節如何君數書筆法
漸逼晉人吾筆法亦少進耶畫不能皆好醉後畫得一二千紙中

時有一紙可觀然多爲人持去於君豈復有愛但幸急畫不成也
今後富有醉筆嘉者聚之以須的信寄去也

十四

耕荒田詩有云家重燒枯草走報暗并出一飽未敢期瓢飲已可
必又有云刮毛龜背上何日得成氈此句可以發萬里一笑也故
以填此空紙

十五

某啓昨日遞中得子由書封示定國手簡承已到江西尊體佳健
忠信之心天日所照旣遂生還晚途際遇未可量也容采老少比

東坡集卷四十九尺牘

八

舊不帶黃茅氣色否呵呵前此發書并令子由轉去必達來教云
此月五六可到九江而子由書十一月方達今且謾遣人不知猶
及見否無絲一的爲賀引領神馳惟萬萬自愛速遣此人書不能
盡言遞中續上問也不宣

十六 以下俱離黃州

某啓今日景繁到泗州轉示十月二十三日所惠書并新詩六首
妙曲一首大慰所懷河凍膠舟咫尺千里意思牢落可知此佳作
終日喜快滯瀘冰釋幸甚幸甚某往揚州入一文字乞常州住得

耗奏邸拘微文不肯投進已別作一狀遣人入京投下近在常州

宜興買得一小庄子歲可得百餘碩似可足食非不知揚州之差窮猿投林不暇擇木也黃師是遣人往南都故急作此書仍和得一詩爲謝他未暇也新濟甚淺凍不可行且夕水到卽起恐須至正初方有水也不知至時公在宋否某若得請或附宜獻公舟尾再來不爾遂派水至西都出陸赴汝也然欲壅却乳母子由乃行卽南都亦須住一月入夜倦迫不盡意惟萬萬自重

十七

某頓首 先帝升遐天下所共哀慕而不肖與公蒙恩尤深固宜作挽少陳萬一然有所不敢者爾必深悉此意無狀坐廢衆欲置之死而先帝獨哀之而今而後誰復出我於溝瀆者已矣歸耕沒齒而已

十八

某啓張公壅嗽經月未已雖飲食不退然亦微瘦數日來亦漸損想必無慮然有書宜令勸固胃氣勿服疎利藥僕屢以勸之仍勸夏秋間先多作善事齋僧施貧之類然後開眼公後日相見時亦可以此勸之且夕遂與之別情味極不佳公得暇早來與之相聚若得此間一差遣亦非小補也留意留意

某啓數日間舟馭入城適患瘡未潰坐起無聊不克修問不審起居何如既無由往見而公又未朝覲企渴不可言當以酒洗泥而久在告酒盡只有大小團密雲五餅雙井一餅亦爲高人無泥可洗爾呵呵病中不盡區區

二十

數日臥病在告不審起居佳否知今日會兩臂清虛陰森正好劇飲坐無狂客冰玉相對得無少澹否扶病暫起見與子田簡大罵書尺往還是擾人可憎之物公乃以此爲喜怒乎仙人王遠云得此書當復劇口大罵之固應爾然而不可以徒罵也知公澹甚往發一笑張十七必在坐幸伸意

東坡卷四十九

尺牘

十

二十一 以下俱
類州

某啓久不奉狀辱書感慰之至比日起居何如謗焰已息端居委命甚喜然所云百念灰滅萬事懶作則亦過矣丈夫功名在晚節者甚多定國豈愧古人哉某未嘗求事但事入手卽不以大小爲之在杭所施亦何足道但無所愧恨而已過蒙示諭慙汗若使定國居此所爲當便驚人亦豈特止此而已本州職官董華密人也能道公政事歎服不已但恨公命未通爾但靜以待之勿令中途翻靜自然獲濟如國手基 煩大段用意終局便須贏也未由會

見千萬保愛不宣

二十二

某啓前日欲附南京書來人不告而去因循至今比日起居何如張丈且喜少安且令安樂幾年慰四方士大夫心豈非好事近日都下又一場紛紛何時定乎穎雖少僻去都下近親知多特來相看者殊倦於應接更思遠去而未能也未緣言面千萬保愛不宣

二十三

某啓近遣人奉書未達問領來誨伏承起居佳勝旋得厚之書知從者入都想已還宋矣某見報移羈老病豈堪此劇郡方欲力辭而請越不惟適江湖之思又免過都紛紛未知允否老境欲少安何時定乎未由言面苑結可知乍暖千萬保練不一

二十四

某啓人來辱書并三詩伏讀感慰仍審起居佳勝報張公臥疾不勝憂聽急要文集不敢不付在杭三年到京數月無頃刻暇時公屬我文集當有所刪潤雖不肖豈敢如此然公知我之深舉世無比安敢復存形迹實欲仰副公意萬一故不敢草草編錄到穎方有少暇正欲編次而連索去不敢不付且乞定國一言檢閱既了仍以相付幸也千萬保愛不宣

某啓別來紛紛未即奉狀爾辱手教感愧深矣且審比來起居佳勝爲慰爲慰公失郡去國士友所嘆然自是計少安其他無足言者某已得潁州極慰所欲但不副張公之意蓋旬日前得子開書極來相禱方安於彼不欲移也故不敢乞聞張公已安慶慰無量會合未可期惟千萬保齋不宣

某啓自公去後事尤可駭平生親友言語往還之間動成坑窞極紛紛也不敢復形於紙筆不過旬日自聞之矣得穎藏拙餘年之

東坡叢四十九尺牘

七

辛也自是朝心錯日矣此身於我稍切須是安處千萬相信日與樂全翁游當執講此理也某甚欲得南都而姪女子在子開家亦有書來云子開欲之故不請想識此意

某啓數辱書一一收領亦一一上狀知已達風俗惡甚朋舊及眼不可復測故不欲奉書畏浮沉爾不罪不罪比日起居住勝公弊屣浮名一寄之天不過淮上上回文以無爲有爾然亦未必如此但恐流俗觀望復作兩楹之說皆不足道也某所被謫仁聖在上不明而明珠無分毫之損但憐彼三子者遂與舒亶李定同傳爾

亦不足云可默勿語也餘惟千萬保愛不宣

二十八

某啓平生欲有一書少自表見於來世因循未成兩兒子粗有文章材性未暇督教之從來頗識長年養生妙理亦未下手三者皆大事今得汝陰無事或可成定國必賀我也言此者亦欲公從事於此爾書至此中心欣躍如有所得平生相知不敢獨饗當頌此意不復念餘事也

二十九

公自此無憂患矣不須復過慮研銘到穎當寄上也

東坡集卷四十九

三

三十一

某啓辱書具審起居佳勝誣罔已辯有識稍慰寵示二詩讀之聳然醉翁有言窮者後工今公自將達而詩益工何也莫是作詩數篇以餉窮鬼耶喜不寐詩甚欲和又礙親嫌皆可一笑也張公今雖微瘦然論古今益明不惟識慮過人定國亦可見矣人事紛紛書不盡言非固莫究

三十一

某甚欲赴樂全之約請南都而子開有書切戒不可又姪女亦有書云舅姑方安於彼不可奪也故不欲請承樂全乃爾見望讀之

極不皇且爲致此懇餘具公書矣定國云有二詩元不封示何也
公平生不愼口好嫻人別後深上斯人極力奉擠公臨行時亦自
覺僕始信之可駭也

三十二 以下離穎州

某啓高休至辱書憂愛矣比日起居何如書意欲一相見固鄙懷
至願但不如彼此省事之爲愈也馭瘴之術惟絕欲練氣二事本
自衰晚當然初不爲禦瘴而作也某其餘坦然無疑雜肉魚蒜遇
着便喫生病老死符到奉行此法差似簡要也君實營云王定國
瘴烟窟裏五年面如紅玉不知遂能如此乎老人知道則不如公
頑愚卽過之朝夕離南都別上狀愈遠加愛不宣

東坡集卷四十九 尺牘

古

三十三

某啓別來三辱書勞問之厚復過疇昔矣衰繆日退而公相好且
加所未論也又中間一書引物連類如見當世大賢意謂是封題
之誤必非見與者而其後姓字則我也尤所不諭然三復其文詞
韻甚美正似蘇州何充畫真雖不全似而筆墨之精已可竒也謹
當收藏以俟講此者而與之如何如何公行復舊官矣差遣亦必
自如意可喜可喜但此去不知會合何日不能無耿耿也真贄輒
作得數句如何可用卽令一善寫小字大代書絹上可也張公集

引厚之字說皆未作別後日紛紛可厭可厭神膏方納上餘勤勤
自愛

三十四 揚州

張公所戒深中吾病雖甚頑狠豈忍不聽願爲致此意也公向令
作勝道埋銘已諾之其家作行狀送至此矣又欲作孫公神道
碑皆不違只告密之勿令人知是某作仍勿令以潤筆見遺乃敢
聞命來詩甚奇真得衝替氣力也呵呵故後詩未及和朝夕別遣
人并致糟淮白所欲宜興田某豈敢有愛於此等然此田見元主
昏顛某見有公文在浙漕處理會未見了絕當亦申都省曰田在
深山中去市七十里但便於親情蔣君勾當爾不知在公月蔣能
如此幹否更籌之

東坡集卷四十九尺牘

五

三十五 以下俱
赴定州

某啓示教承起居佳勝子由疾少間惠藥感刻二方謹秘之五方
續寫得納上下鮪衛子魚賢者也佞才也以爲佞人蓋流俗之誤
山梁雌雉子路以餽孔子孔子知子路將不得其死雉亦好鬪關
喪其生故日色斯舉矣翔而後集若此雉豈時之罪哉其餘義盡
於文初無注解馬或留意少試僕子不肯已遣同一面商量可公
意卽可也李希元已付一簡與子中矣某適與安國說欲來早啓

到淨因今又頭昏去否未可知早癘將作人多不安將愛將愛

三十六

某啓近者崇慶大故中外哀慕想同此悲痛某蒙被知遇尤增頌滅人來領書承起居無恙某本自月初赴任今須俟殿牘畢乃敢朝辭後會何時臨書愴恨惟萬萬自重

三十七

某啓疲曳之餘卽因睡爾尋酒對菊豈復夢見君真世外人也詩亦奇欲和而未暇使事始欲辭免又若無說然衰病極畏此後日未可預刻至時馳問也

東坡集卷四十九尺牘

夫

三十八

某啓甘草已如所論削去矣參四板聊致遠誠并一詩爲笑雪浪齋亦求一篇爲塞上華寵厚之本欲作書適有少冗又筆凍甚疲稍和眼也幸致意

三十九

某啓辱教承起居佳勝昨夕黃昏徑睡五更馬上賞嘉月爾事已一笑出疆已有旨完夫同行也別紙已領

四十以下俱

惠州

某啓適中忽領三月五日手教喜知尊候佳勝貴眷各康健併解

懸情幸甚一官爲貧更無可擇邦生計漸有涯可喜可喜某到此
八月獨與幼子一八三庖者來凡百不失所風土不甚惡其旣緣
此絕棄世故身心俱安而小兒亦遂超然物外非此父不生此子
也呵呵書中所論甚感至意不替疇昔而加厚也幸甚幸甚子由
不住得書極自適道氣有成矣餘無足道者南北去住定有命此
心亦不念歸明年買田築室作惠州人矣伏暑中萬萬加愛不宣

四十一

某一味絕學無憂歸根守一乃無一可守此外皆是幻此道勿謂
渺漫信能如此日有所得更做沒用處亦須作地行仙但屈滯從

東坡集卷四十九

尺牘

七

狗竇中過爾勿說與人但欲老弟知其畧爾間所欲幹實無可上
煩者必欲寄信只多寄好乾棗人參爲望如無的便亦不須差人
豈可以口腹萬里勞人哉所云作書自辯者亦未敢便爾不怨天
不尤人下學而上達知我者其天乎張十七絕不聞消耗懷仰樂
全之舊德故欲其一箴之否

荅黃魯直五首

以下俱
徐州

軾頭首再拜魯直教授長官足下軾始見足下詩文於孫莘老之
坐上聳然異之以爲非今世之人也莘老言此人人知之者尙少
予可爲稱揚其名賦笑曰此人如精金美玉不卽人而人卽之將

逃名而不可得何以我稱揚爲然觀其文以求其爲人必輕外物而自重者今之君子莫能用也其後過李公擇於濟南則見足下之詩文愈多而得其爲人益詳意其超逸絕塵獨立萬物之表馥風騎氣以與造物者遊非獨今世之君子所不能用雖如軾之放浪自棄與世闊疎者亦莫得而友也今者辱書詞累幅執禮恭甚如見所畏者何哉軾方以此求交於足下而懼其不可得豈意得此於足下乎喜愧之懷殆不可勝然自入夏以來家人輩更臥病忽忽至今裁荅甚緩想未深訝也古風二首託物引類真得古詩人之風而軾非其人也聊復次韻以爲一笑秋暑不審起居何如未由會見萬萬以時自重

東坡集卷四十九尺牘

六

二
某啓晁君騷詞細看甚竒麗信其家多異材即然有少意欲曾直以已意微箴之凡人文字當務使平和至足之餘溢爲恠竒蓋出於不得已也晁文竒麗似差早然不可直云爾非謂避諱也恐傷其邁往之氣當爲朋友講磨之語乃宜不知以爲然否不宣

三翰林

某啓前日文潛無咎見臨臥病久之聞欲牽公見過所深願也便欲作書奉屈而兩日坐處苦一瘡極痛至今未穴殊無聊賴得教

并詩慰喜不已瘡兩日當穴又數日可無苦諸公自可准法來問
疾然欲來當先見語公擇舅作憲甚可喜因見爲道區區君實嘗
言破題當似日五色莫作運啓元聖天臨兆民也餘非面不盡

以下俱
惠州

某啓方惠州遣人致浙惠書奉中塗相見尊候甚安卽日想已達
黔中不審起居何如土風何似或云大率似長沙審爾亦不甚惡
也惠州已久安之矣度黔亦無不可處之道也聞行囊無一錢塗
中頗有知義者能相濟否某雖未至此然亦近之矣水到渠成不
須預慮數日來苦痔疾百藥不効遂斷肉菜五味日食淡麪兩碗

東坡集卷四十九

尺牘

九

胡麻茯苓麩數栢其戒又嚴於魯直雖未能作自誓文且日戒一
日庶幾能修之非特愈痔所得多矣子由得書甚能有味於枯槁
也文潛在宣極安少游謫居甚自得淳父亦然皆可喜獨元老奄
忽爲之流涕病劇久矣想非由遠謫也隔絕書問難繼惟倍祝保
愛不宜

五

某有姪婿王即名庠榮州人文行皆超然筆力有餘出語不凡可
收爲吾黨也自蜀遣人來惠云魯直在黔決當往見求書爲先容
嘉其有奇志故爲作書然舊聞其太夫人多病未易遠去謾爲一

言眉人有程遵誨者亦奇士文益老王郎蓋師之此兩人有致窮之具而與不肖爲親又欲往求黃魯直其窮殆未易量也

荅秦太虛七首

以下密州

某啓別後數辱書旣冗懶且無便不一裁荅愧悚之至參寥至頗聞動止爲慰然見解榜不見太虛名字甚惋歎也此不足爲太虛損益但吊有司之不幸爾卽日起居何如參寥真可人太虛所與之不妄矣何時復見臨紙惘惘惟萬萬自愛而已謹奉手啓上問諸事可問參寥而知入夜困倦書不詳悉程文甚美信非當世君子之所取也僕去替不遠尚未知後任所在意欲東南一郡爾得之當遂相見

東坡集卷四十九 尺牘

三

某昨夜偶與客飲酒數盃燈下作李端叔書又作太虛書便睡今日取二書覆視端叔書猶粗整齊而太虛書乃爾雜亂信昨夜之醉甚也本欲別寫又念欲使太虛於千里之外一見我醉態而笑也無事時寄一字甚慰寂寥不宣

三 湖州

某啓昨晚知從者當往何山辱示方悟以雨輟行悔今日不相從也聞只今遂行故不敢奉謁分韻詩語益妙得之殊喜拙詩令見

子錄呈暑濕惟萬萬慎護早還爲佳不一

四黃州

軾啓五月未舍弟來得手書勞問甚厚日欲裁謝因循至今邇中復辱教感愧益甚比日履茲初寒起居何如軾寓居粗遣但舍弟初到筠州卽喪一女子而軾亦喪一老乳母悼念未衰又得鄉信堂兄中舍九月中逝去異鄉衰病觸目懷感念人命脆弱如此又承見喻中間得疾不輕且喜復健吾儕漸衰不可復作少年調度當速用道書方士之言厚自養鍊謫居無事頗窺其一二已借得本州天慶觀道堂三間冬至後當入此室四十九日乃出自非廢

東坡集卷四十九尺牘

三

放安得就此大虛他日一爲仕宦所廢欲求四十九日閑豈可復得耶當及今爲之但擇平時所謂簡要易行者日夜爲之寢食之外不治他事但滿此期根本立矣此後縱復出從人事事已則心返自不能廢矣此書到日恐已不及然亦不須用冬至也寄不詩文皆超然勝絕豐豐焉來逼人矣如我輩亦不勞逼也太虛未免求祿仕方應舉求之應舉不可必竊爲君謀宜多著書如所不論兵及盜賊等數篇但似此得數十首當卓然有可用之實者不須及時事也但旋作此書亦不可廢應舉此書若成聊復相示當有知君者想喻此意也公擇近過此相聚數日說太虛不離口幸老

未嘗得書知未暇通問程公闕須其子后中哀詞軾本自求作今豈可食言但得罪以來不復作文字自持頗嚴若復一作則決壞藩墻今後仍復衮衮多言矣初到黃廩人既絕人口不少私甚憂之但痛自節儉日用不得過百五十每月朔便取四千五百錢斷爲三十塊掛屋梁上平旦用畫叉挑取一塊卽藏去又仍以大竹筒別貯用不盡者以待賓客此賈耘老法也度囊中尚可支一歲有餘至特別作經畫水到渠成不須預慮以此胸中都無一事所居對岸武昌山水佳絕有蜀人王生在邑中往往爲風濤所隔不能卽歸則王生能爲殺鷄炊黍至數日不厭又有潘生者作酒店

東坡集卷四十九

尺牘

三

樊口棹小舟徑至店下村酒亦自醇醞柑橘榭梯極多大芋長尺餘不減蜀中外縣米斗二十有水路可致羊肉如北方猪牛麀鹿如土魚蟹不論錢岐亭監酒胡定之

載書萬卷隨行喜借人看黃州

曹官數人皆家善庖饌喜作會太虛視此數事吾事豈不旣濟矣乎欲與太虛言者無窮但紙盡耳展讀至此想見掀髯一笑也子駿固吾所畏其子亦可喜曾與相見否此中有黃岡少府張舜臣者其兄堯臣皆云與太虛相熟兒子每蒙批問適會葬老乳母今勾當作墳未暇拜書歲晚苦寒惟萬萬自重李端叔一書託爲達

之夜中微被酒書不成字不罪不罪不宣軾再拜

五 離黃州

某啓別後欲奉書紛紛無暇且謂卽見無所事書而日復一日遂以至今疊辱手教具聞動止甚慰某宜興已得小田至楊附遞乞居常仍遣一姪孫子賁錢往宜興納官蓋官田也須其還乃行而至今未來計亦無他特其子母難別爾見艤舟竹西待之不過更三兩日必至必能於冬至前及見公也小兒子不歷事亦微憂故不欲捨之前去遲見之意殆以日爲歲也傳神奇妙之極贊若思得之當奉呈也餘非而不盡不一

六 以下俱
北歸

東坡集卷四十九 尺牘

三

某書已封訖乃得移廉之命故復作此紙治裝十日可辦但須得泉人許九船卽牢穩可恃餘蛋船多不堪而許見在外邑未還須至少留待之約此月二十五六間方可登舟並海岸行一日至石排相風色過渡一日至通角場但相風難克日爾有書託吳君履二十壯夫來通角場相等但請雇下未要發來至渡海前一兩日當別遣人去報也若得及見少游卽大幸也今有一書與唐君內有見子書託渠轉附去料舍弟已行矣餘非可莫究

七

某啓近累得書教海外孤老志節朽敗何意復接平生欽友伏聞

妙迹瀟灑有生意幸甚幸甚比日毒者尊候佳否前所聞果的召
若信然得文字後亦須得半月乃行自此徑乘蛋船至徐聞出路
不知猶及一見否示論二范之賢不惟喜公得婿小范且以慶吾
友夢得之有子爲不死也言之淚下不已過蒙許與恐不副所期
實能躬勞辱以佚考爾令子想大成曾寄所作來否借一二亦
佳文潛無咎得消耗否魯直云宜義監鄂酒吳子野自五羊來云
溫公贈太尉曾子宣右揆的否未可知也廉州若得安居取小子
一房來終焉可也生如暫寓亦何所擇果行衝冒愼重

荅張文潛四首

以下俱
惠州

東坡集卷四十九

尺牘

詩

某啓久不奉書忽辱專人手教伏讀感嘆且審爲郡多暇起居在
勝至慰至慰疾久已掃除但凡害生者無復有則真氣日滋骨髓
餘益形神卓然復壯無三年之功也某清淨獨居一年有半爾已
有所覺此理易曉無疑也然絕欲天下之難事也始似斷肉今使
人一生食菜必不肯且斷肉百日似易聽也百日之後復展百日
以及暮年幾忘肉矣但且立期限決有成也已驗之方思以奉
傳想識此意也蒙遠致兒子書信感激不可言子由在筠甚自適
養氣存神幾於有成吾儕殆不如也聞淳父魯直遠貶爲之悽然
此等必皆有以處之也某見寓監司行館下臨二江有樓劉夢十

差望賦句句是也瘴癘雖薄有然不惡與小兒不曾病也過甚有
幹蠱之才舉業亦少進侍其父亦然恐欲知之解憂爾會合未期
臨書悵惘惟萬爲道自重不宣

二

某啓屏居荒服真無一物爲信有枕椰方杖一枚前此土人不知
以爲杖也勿謂微陋收其遠意爾荔枝正出林下恣食亦一快也
羅浮曾一游每出勞人不如閉戶之有味也木不輟服無憂言竟坐
修造不肖累之也愧怍家有婢能造酒極佳全似王晉卿家碧香
但乏可與飲者爾羅浮有道士鄧安安雖朴野養練有功至行清
苦常欲濟人深可欽愛見邀之在此又頗集醫藥極有益也曾子
開墮農師俱不免以知黜定非智力所能避就也小兒承問不欲
令拜狀煩覽也

東坡集卷四十九尺牘

五

少游得信否奉親必不失所

四

來兵王告者極忠厚方某流離道路時告奉事無少懈又不憚萬
里再來非獨走卒中無有也願公以某之故少優假之置一好科
坐處當時與同來者顧成亦極小心今來江海者亦謹恪遠來極

不易可念愧

荅李端叔十首

翰林

屢書并示伯時所畫地藏某本無此學安能知其所得於古者爲誰何但知其爲軼妙而造神能於道子之外探顧陸古意耳公與伯時想皆期我於度數之表故特相示耶有近許吳畫百廿字輒對呈并畫納上

二 定州

某啓辱簡承起居住勝近讀近藁諷味達晨輒附小詩更蒙酬和益深感嘆朝夕就局中會話也

東坡集卷四十九尺廣

共

三 以下俱
北歸

某六十五矣體力毛髮正與年相稱或得復興公相見亦未可知已前者昔夢已後者獨非夢乎置之不足道也所喜者海南了得易書論語傳數十卷似有益於骨朽後人耳目也少游遂死於道路哀哉痛哉世豈復有斯人乎端叔亦老矣追云鬚髮已皓然顏極丹且渥僕亦如此爾各宜闕齋庶復相見也兒姪在治下類與教有一書幸逆與醉中不成字不罪不罪

四

某啓辱書多矣無不達者然終不一荅非獨衰病簡懶之過實以

罪垢深重不忍更以無益寒温之間玷累知友然竟不免累公慚
負不可言比日計赴潁昌伏惟起居佳勝眷聚各安健某移永州
過五羊徑渡大庾至吉出陸去長沙至永何叔靜諸人照管不甚
失所叔靜孳舟相送數十里大浪中作此書無他祝惟保愛之外
酌酒與婦飲尚勝俗侶對梅一丈詩云爾

五

杲啓近託孫叔靜奉書遠地得達否比來尊體何如眷聚各計康
勝某蒙恩復舊職秩領真詞世間美事復有過此者乎伏惟君恩
之重不可量數遙知朋友爲我喜不寐也今已到虔州卽往澗間
居度多在毗陵也子由開已歸許秉燭相對非夢而何一書便乞
達與餘惟自愛

六

子由近得書度已至岳矣養鍊極有功可喜可喜三兒子在此甚
安健不敢令拜狀黃魯直張文潛晁無咎各得信否文潛舊疾必
已全愈乎

七

朝雲者死於惠州久矣別後學書頗有楷法亦學佛臨去誦六如偈
以絕葬之惠州栖禪寺僧作亭覆之榜曰六如亭最荷夫人垂顧

故詳及之得此書後幸作數字寄永邇仍取兒姪輩一書爲幸

八

某啓承諭長安君偶患臂痛不能舉某於錢昌武朝議處傳得一方云其初本施渥寺丞者因寓居京師甜水巷見一乞兒兩足拳彎捺履行渥常以飲食錢遺之凡暮年不衰尋赴任數年而還復就曩居則乞兒已不見矣一日見之於相國寺前行走如風驚問之則曰遇人傳兩藥方服一料而能行因以其方授渥以傳昌武昌武本患兩臂重痛舉不能過耳服之立效其後傳數人皆神妙但手足上疾皆可服不拘男子婦人秘之其方元只是王氏博濟

東坡集卷四十九

尺牘

天

方中但人不知爾博濟方誤以虎脰爲腦使請長安君合服必驗

九

某啓濶別八年豈謂復有見日漸近中原辱書尤數喜出望外此日起居佳勝某已得舟決歸許如所教而長者遽舍去深以爲恨具報除輦運似亦不惡近日除日時有如人所料者則此後端初必已信眉矣乎但老境少安餘皆不足道乍熱萬萬以時自愛不

宣

十

某本以囊裝罄盡而子由亦久困無餘欲就食淮浙已而深念

老境知有幾日不可復作多處又得子由書及見教語尤切至已
決歸許下矣但須至少留儀真令兒子往宜興刮刷變轉往還須
月餘約至許下已七月矣去歲在廣州託孫叔靜寄書及小詩達
否叔靜雲端叔一生坎軻晚節益牢落正賴魚軒賢德能委曲相
順適以忘百憂此豈細事不爾人生豈復有佳味乎叔靜姻友想
得其詳故輒以奉慶忝契不罪不罪

與趙德麟十七首

以下俱
杭州

候吏來特承書教禮意兼重感忤不已比日起居何如養廨便郡
得親宗彥幸甚行役迫遽裁謝草畧想蒙恕察

東坡集卷四十九

尺牘

三

明守一書託爲致之育王大覺禪師仁廟舊所禮遇嘗見御筆賜
偈頌其畧云伏覩大覺禪師其敬之如此今聞其困於小人之言
幾不安其居可歎可歎太守聰明老成必能安全之願公因語款
曲一言正使凡僧猶當以仁廟之故加禮而況其人道德文采雅
重一時乎此老今年八十二若不安全當使何往恐朝廷聞之亦
未必喜也某方與撰宸奎閣記旦夕附去公若見此老當爲致意

三
以下俱
穎州

人來辱書伏審履茲畏暑起居佳勝爲慰見念之深正如懷仰之

意不肖獨賴覓無咎在此方憂其去若果得德麟爲代真天假老拙也既未欲來此寄居常令爲於高郵尋安下處續當馳報也未聞萬萬自重

四

別後思仰不可言竊計起居住勝得舍弟書奉太夫人久服藥近已康復伏惟歡慶到郡兩月公私勞冗有稽上問想未深責會合未期惟冀侍奉外千萬保重

五

昨日幸接笑語今日知舉掛聞之後時不及往慰悚息悚息三日

東坡集卷四十九尺牘

三

臂痛今日幸減錄舊詩一篇奉呈聞公亦欲借示詩藁幸付去人上清宮成而有德意謂守臣當有賀表如何如何謀之於公幸畧垂示

六

某啓數日不接思渴之至衝冒風雪起居何如端居者知愧矣佛陀波利之虐一至此耶乃知退之排斥不爲無理也呵呵酒二壺迎勞唯加鞭加鞭

七

字說改多寫了納去背時兩葉實糊合之仍用皂綾夾襍紀之片

皂綬夾之
標兩面也 仍請前後各着一空葉

八

某啓欽服下風爲日久矣遲暮相從傾蓋如故非獨氣類自然抑亦夙昔緣契人來辱手教得聞起居佳勝堂上康福感慰深矣某凡百如昨又得無咎相切磨之幸德麟替後想必有殊命萬一尚未一來爲無咎交承亦佳又聞欲寄居此間可先示論也萬萬自重三宣

九以下俱
赴揚州

惠示二詩伏讀慰抑不可言某途中及到此絕少暇止有數首不

東坡集卷四十九尺牘

三

佳又未有工夫錄去容稍積多并奉呈也今且次韻二首爲一笑

十

某啓宦遊無定得友君子又復別去悵惘可量數日竊想起居佳勝到壽淮山漸有佳思懶不作詩亦無人唱和也乍遠萬萬自重不宜

十一

淮南夏頗熟然積欠爲害疾瘵殆未有安理淝西疲甚歲事亦可知餘非書所能盡德麟孤風超然願少貶以忍濟爲念必亮此意

此中有幹幸示及杭州買物人已回內中所欠俞君錢此有便當

先爲寄還之如遣還之可速示免重寄也滑蓋得錢都正書已琢磨兼與錢訖非久必寄來卽附上

十二

文廣獄斷勅下可畧示也李尉推恩有耗否尹遇案必已上古人云雷霆之下恐難獨當願掛一名以今觀之此人真難得也亦勿深恠之知穎尾夏田損半秋有望否淮南東西秋夏皆大熟亦一樂土也獄官不惟庇爲前勘乃是深爲不待結案而移司者周慮也若勘作故出則指揮移司官不得不問上下欺罔不得不令人憤憤某亦無由入文字亦有以論之恐不濟事太息而已

東坡集卷四十九 尺牘

三

十三 以下俱揚州還朝

其啓魯直寄書來甚安并得少雙井今附納上蒙惠竒茗絕妙因見太守爲致意爲適病在告數日未果奉書要臨淄堂記秋涼稍暇可作也月老亦致意熱甚又多病未暇作法施堂銘不一

十四

某啓近專使手書爲使者云往西洛還當取書故未荅辱教字具審起居佳勝感慰兼集公未卽解去與俗子久處良不易然有忍乃濟願以不見不同無盡待之某到此半月無可樂者過大禮卽重乞會稽爾無緣面謝幸恕草草

累辱手教感慰無量比日起居佳勝大禮已近隨分冗迫未得卽見賢者深增悵悵也乍寒萬萬以時自重

紛紛尚未暇往見思企之極陰寒起居佳勝否甘釀佳貺輒踐前言作賦可轉呈安定否無事見臨幸甚

辱教承台候佳勝地疾猶未退尚潮熱惡寒也來日必赴盛會未得後日猶恐當調告也辱意甚寵適曾如此非所願幸千萬加恕

子由固當馳赴也穆公且喜漸安臥病書此不謹

